

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Munir. A. Azim (atba)

05 Juin 2020

13 Shawwal 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

Bane Attributs d'Allah (Pt. 7)

Li essentiel ki zot conner avec certitude ki zot ena ene Bondié Qui Li-même Li le Créateur et c'est Li Qui Soutenir l'existence en entier, Li Tout-Puissant, et So bane attributs zot éternels et interchangeable. Li éloigné, mais proche. Li proche, mais éloigné. Li Unique, mais So bane manifestations zot diverses [] multiples. Allah pas capave subir aucune changement, parski Li éternellement Inchangeable et Parfait dans So bane attributs. Pas préfère le monde, so bane ressources ou zot proches au lieu de Li, mais préfère-Li à tous bane les autres kitchose afin ki dans les ciels zot vine du nombre de bane ki inscrire dans So communauté.

Le Dieu ki Tout-Puissant fine de tout temps manifesté So miséricorde. Si zot ouler jouir de sa, alors zot bizin faire en sorte ki nannié pas sépare zot de Li, ki zot volonté soumette entièrement à So volonté, et ki zot bane plaisirs et désirs identifier complètement à celui d'Allah [à Allah So bane plaisirs et désirs, à tout saki Li envie zot faire pour Li]. Quel que soit bane circonstances, réussite ou échec, reste toujours prosterné devant la porte, devant dévrière de So Trône, afin ki Li accompli saki Li envie, d'après So propre volonté. Déploie tout saki en zot pouvoir pour établir So l'unicité lors la terre. Montrer zot bon et rempli de

miséricorde envers So bane créatures ; pas faire zot aucaine ditort, que ce soit avec zot la langue, zot la mains ou par n'importe ki les autres moyens, et travaille pour promouvoir [améliore] zot sort.

Pas agir de façon orgueilleux [arrogant, vantard] avec personne, même si li zot subalterne [travaille enba ou, sous ou commandement, ou même si li ou] serviteur, et pas zoure personne ou blesse li par zot la langue même si ou pé gagne zouré et toutes sortes kalités causer. Vine humbles et gentils, et gagne vraie sympathie pour bane dimounes couma zot afin ki Allah accepter zot. Ena beaucoup dimounes ki zot humbles seulement en apparence, mais au fond, c'est bane véritables lé-loups ki mort de faim. Extérieurement, zot paraite ena ene nature pure, mais intérieurement, zot bane véritables vipères. Allah pou accepter zot seulement si zot la langue et zot bane actions conforme à zot lé cœur. Si zot jouir d'ene rang haute, alors montrer considération envers bane ki enbas zot, et pas méprise zot. Si zot bane savants, alors pas faire zot propre éloges, et pas regarde et traite bane ignorants de façon orgueilleux et vaniteux, mais éclaire zot avec zot bane bons conseils. Si zot riches, pas faire zot propre éloges, et pas montrer zot fiers vis-à-vis bane pauvres, mais servi zot et aide zot.

Écarte-zot de bane chemins ki amène vers la ruine. Gagne la crainte d'Allah, adopter la droiture, pas adore bane *Pirs* et pas alle lors bane *Dargas*. Coupe zot de tous bane innovations ; tout sa c'est pas bane l'enseignements de l'Islam. Dévide zot les cœurs de tout saki mondaine. Offert-zot entièrement à Allah; pas passe par bane intermédiaires : bane *Pirs*, ou même bane *Wali'ullahs*. Servir Allah seulement et consacrer tout zot la vie à So service, et haïr tous bane impuretés et tous bane mals pour l'amour d'Allah, parski zot Bondié, zot Allah Li Saint.

Ki sak matin témoigner ki zot ti vertueux durant la nuit, et ki sak soir témoigner ki zot fine passe la journée dans la crainte d'Allah. Pas gagne aucaine peur de bane malédictions de sa le monde là, parski zot sans l'importance, zot pas vaut nannié, et zot capave transforme la lumière en noireté. Gagne plutôt peur de la malédiction d'Allah, sa malédiction ki dessane du ciel, ki li dans sa le monde ici-bas là et dans Aakhérat, parski du moment ki li tombe lors ene dimoune, li détruire li.

Tous bane louanges appartenir à Allah, Qui Li tousel fine créer et trace le destin de So bane Créatures. Li Unique à gouverner avec ene l'autorité exclusive et c'est

Li Qui détermine tout kitchose. Li ene tel lé Roi ki pas comparable avec aucaine kitchose. Li trouve tout et Li entende tout kitchose ! Pas ena aucaine ministre dans So royaume : Li le Souverain Qui possède tout (*Al-Maalik*) et rien ni personne, ki li tipti ou grand pas pou capave échappe à So l'emprise (*Mulk*). Allah pas ena aucaine pair, aucaine semblable dans So perfection, Li transcende toute forme ou représentation dans la totalité de So Essence. Li Omniscient, kot nannié ki trouve dans bane les cœurs pas échappe à So connaissance : Eski Celui Qui fine crée pas pou conner saki zot pé cachiette, tandis ki Li le Subtil, l'Informé ? Li le Savant kot So connaissance englobe le principe de bane kitchoses et zot bane destination. Li Celui ki tende tout ; So faculté pou tende ene kitchose li tellement raffiné ki pas ena aucaine différence pour Li entre ene parole prononcé à haute voix ou à voix basse. Li le Pourvoyeur Qui accorde So grâce à So bane créatures en assurant zot subsistance. Li Celui Qui subsister [exister] par Li-même et Li prend responsabilité de So création dans tous bane circonstances.

Li le Donateur Qui fine accorde à bane êtres zot l'existence ; Li le Puissant Qui pou faire zot ré-vine à la vie après ki Li pou donne zot la mort. Li Celui Qui pou rétribuer et récompense bane créatures le Jour kot zot pou présenter devant Li, en fonction de zot bane bons ou mauvais travaux.

Gloire à sa Être Divine [Allah] Qui fine accorde So Générosité à So bane créatures avant même ki Li fine accorde zot l'existence, kot Li fine prend lors Li-même pou accorde zot, zot subsistance [manger, boire etc.], et pour sa, Li pas guetter si pas intel croire dans Li ou fine rénié Li ! Li accorde zot tous zot subsistance sans distinction ! Li soutenir sak être par bane dons ki Li accorde zot, et So Essence préserve l'existence même de sa le monde là kot Li assure l'existence [de sak être] de So permanence [Allah So permanence]. Par So Sagesse Li fine manifesté Li lors la terre et par So puissance, dans bane les ciels aussi. Mo attester donc, en tant ki serviteur soumis à bane décrets d'Allah, kot mo abandonne [soumette] moi à So bane décisions et à So bane décrets, et mo attester ki pas ena aucaine divinité aparte Allah, Li unique, et Li pas ena aucaine associé.

Le 30 Mai dernier, ene de bane *Mujtaba* (choisie) de nous Jamaat dans l'Inde, dans Tamil Nadu fine recevoir ene message rafraichissant de la part d'Allah lors So bane attributs, So gloire et So louange. Sa message là ena ene profond connexion avec mo bane Khutba lors le sujet. Sa fine passer pendant *Salaat-ul-Zuhr*, kan Saleem Sahib et so tifille lynul Misbah ti pé prier [faire *Namaz*]. Pendant *Namaz*,

Saleem Sahib fine tende so tifille commence frédonne ene l'air de façon très claire. Kan *Namaz* fine fini, li fine demande li kifaire li fine faire sa, et ki faudé pas li faire coumsa, ki sa li bien détestable pour faire sa dans *Namaz* parski zot devant Allah ! Alors so tifille fine dire li ki bane paroles pé vine automatiquement lors so la lèvres et ki li pas ti ena aucaine contrôle lors saki pé arrive li. Alors, so papa fine demande li pou écrire saki li fine recevoir. Alors le message li comme suite :

Bismillah-ir-Rahman-ir-Rahim

Laa Ilaaha Illallah Muhammadur Rassullullah (2 fois)

[Pas ena aucaine les autres Bondié excepté Allah, et Muhammad (saws) Li le

Messenger d'Allah]

Allah Grand (2 fois)

Allah tellement Pur

Allah Li Tout

Soubhan-Allah, Allah Pur

Alhamdulillah, Allah Grand

Allah Li Tout

Allah fine créer nous ainsi ki tout kitchose

MERCI ALLAH

Alhamdulillah

Laa Ilaaha Illallah Muhammadur Rassullullah

C'est certainement ene très bon l'expérience spirituelle. Ki Allah béni bane zenfants et bane adultes de So Jamaat – **Jamaat Ul Sahih Al Islam** – afin ki zot tout capave connecter avec Li à travers So bane attributs, So glorification et So louange. Ki Allah aide bane croyants pou approche avec Li avec respect, l'amour et l'obéissance.

Zot bizin conne bien [saki pou vini] Ô mo bane frères et sœurs. La foi sincère dans Allah pou guide zot vers le Salut tandis ki l'hypocrisie et l'infidélité pou amène zot vers la damnation [le feu de l'enfer]. L'hypocrisie pas pou capave sauve zot parski zot Bondié Li ene Bondié ki lire bane secrets ki pli intime de zot les cœurs. Eski zot croire ki zot pou capave trompe Li ? Zot bizin francs, propres, purs et intègres. Si ena le moindre parcelle de noirté dans zot, sa pou faire zot la lumière disparaite, et si ena l'arrogance, la vanité, paresse et l'insensibilité dans zot, Allah pas pou prend charge de zot. Pour aujourd'hui, mo arrête ici même.

Mo faire *duahs* pour ki Allah donne moi le *Tawfeeq* pour continuer lors le même sujet – bane attributs d’Allah – la semaine prochaine. Ki Allah inspire zot la réalité de So bane attributs, et invoque Li par So bane attributs à sak moment de zot la vie lors la terre, et surtout pas oublier remercier Li pour sak faveur ki Li accorde zot. Non seulement pour bane faveurs divines, mais aussi pour bane épreuves ki Li faire zot passer afin ki zot approche zot plisse avec Li. *Insha-Allah*, zot pou trouve la paix, la sérénité, la sécurité, guérison et la miséricorde dans sa [dans So *Zikr* – en récitant So bane attributs]. *Ameen*.